

UGOVOR
o nabavci, isporuci, montaži, instalaciji i puštanju u rad
mobilnog komunikacijskog centra veze

I UGOVORNE STRANE

1. **Kantonalna uprave civilne zaštite Kantona Sarajevo**, Fehima ef. Čurčića br. 1., 71000 Sarajevo, koju zastupa direktor, Dženan Brkanić, (u daljnjem tekstu: **Kupac**), ID broj: 4200665390008 i
2. **MIBO Komunikacije d.o.o.**, ul. Tvornička br. 3., 71000 Sarajevo, kojeg zastupa direktor, Marko Boštjančić, (u daljnjem tekstu: **Prodavac**), ID broj: 4200470540005.

U daljnjem tekstu Ugovora, kada se Kupac i Prodavac navode zajednički, tj. zbirno, tada su označeni kao „Ugovorne strane“.

II OSNOV ZA ZAKLJUČENJE UGOVORA

Osnov za zaključenje ovog Ugovora je Odluka o izboru najpovoljnije ponude za nabavku roba, Kupca, broj: 06-11-1070-7/23 od 11.10.2023. godine.

III PREDMET UGOVORA

Član 1.

Predmet ovog Ugovora je nabavka, mobilnog komunikacijskog centra veze koja uključuje nabavku, radio komunikacijske, informacijske i druge opreme, kao i vozila za smještaj i transport te opreme, njihovu isporuku, montažu, instalaciju, programiranje, testiranje, puštanje u rad i obuku prema tehničkim specifikacijama, koje su navedene u Tenderskoj dokumentaciji za nabavku roba Kupca, broj: 06-11-1070-2/23 od 24.08.2023. godine, kao i u Ponudi Prodavca, br. PON-472/23 od 09.10.2023. godine, koje čine sastavni dio ovog Ugovora.

Član 2.

Mobilni komunikacijski centar veze sa radio komunikacijskom, informacijskom i drugom opremom, kao i vozilom za smještaj i transport te opreme (u daljnjem tekstu: roba), Prodavac je dužan isporučiti, montirati i instalirati prema svojoj Ponudi, te po uputstvima Kupca i u skladu sa važećim sa tehničkim propisima, pravilima i standardima.

IV CIJENA I NAČIN PLAĆANJA

Član 3.

Ukupna vrijednost ugovorene robe bez PDV-a definisane u članu 1. ovog Ugovora iznosi: 401.700,00 KM (slovima: četiristotinejednahiljadasedamstotina KM).

PDV na ukupnu vrijednost ugovorene robe iz stava (1) ovog člana iznosi 68.289,00 KM (slovima: šezdesetosamhiljadadvijestotinosamdesetdevet KM).

Ukupna vrijednost ugovorene robe sa PDV-om iznosi 469.989,00 KM (slovima: četiristotinešezdesetdevethiljadadevetstotinaosamdesetdevet KM).

Cijena je fiksna i ne podliježe nikakvim promjenama za vrijeme trajanja Ugovora.

Kupac se obavezuje da će ukupni iznos iz stava 1. ovog člana isplatiti na račun Prodavca broj: 1994990000292762 otvoren kod Sparkasse banka d.d.

Član 4.

Ugovorne strane su saglasne da će Kupac ukupnu vrijednost iz člana 3. stav 3. ovog Ugovora isplatiti u roku od 30 dana od dana isporuke, montaže i instalacije robe, ako prilikom primopredaje Kupac nema primjedbi na isporučenu, montiranu i instaliranu robu.

U slučaju da se prilikom primopredaje robe, konstatuju nedostaci i odstupanja od tehničkih specifikacija datih u Ponudi br. PON-472/23 od 09.10.2023. godine, Kupac se obavezuje da će isplatu izvršiti odmah, a najkasnije u roku od 10 dana, nakon što Prodavac otkloni nedostatke konstatovane u Zapisniku o primopredaji roba iz člana 8. stav 4. ovog Ugovora.

V ROK I MJESTO ISPORUKE

Član 5.

Prodavac se obavezuje da će robu iz člana 1. ovog Ugovora, isporučivati, montirati, instalirati, programirati, testirati i pustiti u rad najkasnije u roku od 365 dana od dana potpisivanja Ugovora na adresu: Ispostava Stup Profesionalne vatrogasne jedinice Kantonalne uprave civilne zaštite Kantona Sarajevo, ul. Briješćanska br. 14., 71000 Sarajevo.

Član 6.

Ugovoreni rok isporuke robe iz člana 5. ovog Ugovora, može se produžiti u slučaju:

- nastanka više sile ili drugih okolnosti koje Prodavac nije mogao predvidjeti,
- kada ugovorne strane sporazumno produže ugovorni rok.

Pod višom silom se podrazumijeva slučaj kada ispunjenje obaveze postane nemoguće zbog vanrednih vanjskih događaja na koje Prodavac nije mogao uticati, niti ih predvidjeti ili spriječiti.

Član 7.

Ugovoreni rok isporuke robe zbog nastanka više sile ili drugih okolnosti koje Prodavac nije mogao predvidjeti može se produžiti do maksimalno 10 dana i isti odobrava Kupac, s tim što je Prodavac dužan da u roku od sedam dana od nastanka više sile ili drugih okolnosti zbog koji ne može izvršiti svoje obaveze po ovom Ugovoru, obavijesti Kupca.

Ukoliko Prodavac svoje obaveze, zbog dejstva više sile ili nastanka nepredviđenih okolnosti, ne može ispuniti u roku iz prethodnog stava, Kupac ima pravo na raskid Ugovora.

VI KVALITET ROBE

Član 8.

Prodavac se obavezuje da isporučena roba iz člana 1. ovog Ugovora, bude traženog kvaliteta i karakteristika, odnosno kvaliteta i karakteristika koji je dao u svojoj Ponudi, br. PON-472/23 od 09.10.2023. godine, a koju je Kupac odabrao kao najpovoljniju.

Kvalitet i karakteristika robe koja je predmet ovog Ugovora, kontrolisat će ovlašteni predstavnici Prodavca i Kupca.

Primopredaju robe između Prodavca i Kupca izvršit će ovlašteni predstavnici Prodavca i Kupca.

O navedenoj primopredaji robe sačinjit će se Zapisnik o primopredaji, odmah, a najkasnije u roku od 24 sata, od prijema, montaže, instalacije, programiranja, testiranja, obuke i puštanja u rad cjelokupne robe, koji će potpisati ovlašteni predstavnici Prodavca i Kupca.

Član 9.

Sva eventualna odstupanja i nedostaci, prilikom primopredaje robe, konstatovat će se Zapisnikom o primopredaji robe.

Prodavac se obavezuje da će primjedbe konstatovane Zapisnikom o primopredaji otkloniti, o svom trošku, odmah, a najkasnije u roku od 15 dana, od dana potpisivanja navedenog Zapisnika.

Ako u navedenom roku Prodavac ne otkloni primjedbe konstatovane Zapisnikom o primopredaji robe, Kupac zadržava pravo da raskine Ugovor.

VII OBAVEZE PRODAVCA I KUPCA

Član 10.

Prodavac se obavezuje:

- da će ugovorene obaveze izvršiti blagovremeno, u ugovorenom roku, stručno i kvalitetno u skladu sa važećim tehničkim normativima i standardima, sve prema dostavljenom Ponudi;
- da će odrediti stručna lica koja će rukovoditi izvršenjem poslova montaže, instaliranja, programiranja, testiranja i puštanja u rad roba, kao i stručna lica koja će izvršiti obuku osoblja Kupca za rad na montiranoj i instaliranoj robi;
- da će Kupcu omogućiti nadzor nad vršenjem isporuke, montaže, instalacije, testiranja i puštanja u rad roba, te da će na njegov zahtjev obustavi isporuku, instalaciju, testiranje i puštanje u rad roba ukoliko se utvrdi da se iste izvode nekvalitetno i mimo tehničke dokumentacije;
- da će u roku od sedam dana od dana zaključivanja/obostranog potpisivanja ugovora, dostaviti garanciju za uredno izvršenje ugovora u obliku bezuslovne bankarske garancije u iznosu od 10% od ukupne ugovorene cijene iz člana 3. ovog Ugovora, sa klauzulom plativo na prvi pisani poziv korisnika garancije i bez prava prigovora, sa rokom važnosti: rok izvršenja ugovornih obaveza;
- da će snositi odgovornost za štetu u toku izvršenja ugovora nastalu radnicima Prodavca ili trećim licima,
- da će u najkraćem roku otkloniti eventualne nedostatke koji mu budu predočeni prilikom primopredaje roba iz člana 1. ovog Ugovora od strane ovlaštenog lica Kupca;
- da će prilikom primopredaje roba iz člana 1. ovog Ugovora, Kupcu predati uputstva za rad na montiranoj i instaliranoj robi, koja moraju biti napisani na jednom od službenih jezika u Bosni i Hercegovini, kao i svu potrebnu prateću dokumentaciju za istu i to: garantne listove za ponuđenu robu iz tehničke specifikacije, dokumentaciju potrebnu za registraciju vozila i drugu tehničku dokumentaciju.
- da će obaviti obuku osoblja Kupca za korištenje i održavanje opreme koja je predmet ugovora.

Član 11.

Kupac se obavezuje:

- da će izvršiti uplatu ukupne cijene vrijednosti ugovorene robe iz člana 3. ovog Ugovora, na način i u roku utvrđenom u članu 4. ovog Ugovora;
- da će pismeno obavijestiti Prodavca o svakom eventualnom propustu Prodavca u odnosu na pitanja utvrđena ovim Ugovorom.

VIII GARANTNI ROK, UGOVORNA KAZNA I RASKID UGOVORA

Član 12.

Za isporučenu i montiranu robu važe garancije proizvođača robe, s tim što je Prodavac dužan da svu dokumentaciju o garancijama proizvođača robe, pribavi i preda Kupcu, zajedno sa uputstvima za njihovu upotrebu.

Garantni rok teče od dana kompletne isporuke i montaže robe.

Član 13.

Prodavac se obavezuje da će u toku garantnog perioda na osnovu pismenog ili usmenog zahtjeva Kupca o svom trošku otkloniti kvar ili zamijeniti tehničku neispravnu robu na svim lokacijama gdje je roba montirana i instalirana.

Član 14.

Ukoliko Prodavac ne izvrši svoje obaveze u ugovorenom roku, dužan je da, Kupcu za svaki dan zakašnjenja plati ugovornu kaznu u iznosu od 0,1% od ukupne vrijednosti ugovora bez PDV-a.

Ukupna vrijednost ugovorne kazne koja se plaća ne može iznositi više od 10% od ukupne vrijednosti Ugovora.

Član 15.

Ukoliko isporuka roba ne bude u ugovorenom roku iz člana 5. ovog Ugovora ili u dodatno dogovorenom roku iz člana 7. ovog Ugovora, Kupac zadržava pravo jednostranog raskida Ugovora. Razlog za raskid Ugovora može biti stečaj, likvidacija ili drugi oblik prestanka postojanja Prodavca ili više sile.

Ugovorne strane su dužne u roku od sedam dana obavijestiti drugu stranu o nastupanju razloga zbog kojih se ne može realizovati ovaj Ugovor.

IX PRIJELAZNE I ZAVRŠNE ODREDBE

Član 16.

Prodavac nema pravo zapošljavati, u svrhu izvršenja ovog ugovora, fizička ili pravna lica koja su učestvovala u pripremi tenderske dokumentacije ili su bila u svojstvu člana ili stručnog lica koje je angažirala Komisija za nabavke, najmanje šest mjeseci po zaključenju ugovora, odnosno od početka realizacije ugovora.

Član 17.

Na sva pitanja koja nisu regulisana ovim Ugovorom, a pojave se prilikom njegove realizacije primjenjivat će se odgovarajuće odredbe Zakona o obligacionim odnosima.

Član 18.

Ugovorne strane su saglasne da će sve nesuglasice i sporove, koji eventualno mogu da proisteknu iz ovog Ugovora, prvenstveno nastojati riješiti sporazumno, a ukoliko, iz ma kog razloga, to ne budu moguće, nadležan je Općinski sud u Sarajevu.

Član 19.

Ovaj Ugovor stupa na snagu danom njegovog potpisivanja od strane ovlaštenih predstavnika Prodavca i Kupca, i isti će se primjenjivati do izvršenja svih obaveza predviđenih ovim Ugovorom.


Član 20.

Ovaj Ugovor je sačinjen u 6 (šest) istovjetnih primjerka, od kojih svaka od ugovornih strana zadržava po 3 (tri) potpisana i ovjerena primjerka.

ZA



Broj: 01-109/23
Sarajevo, 02.11.2023. godine



Broj: 06-11-1070-11/23
Sarajevo, 27.10.2023. godine

